



Ebars en tu deo d'an oter,  
 E tisqennas ar messajer,  
 Hag e laraz da Zachari:  
 Ema graç Doue en ho ti.

Exocet eo bet ho peden,  
 Doue a ro deoc'h ho qoulen;  
 Ho pried, qent nemeur ac'han,  
 E devo eur mab hanvet Yan.

Ar mab-se a vo eur zant-bras,  
 Eur precursor d'ar Messias:  
 Ar c'hraç en devo da velet  
 Nep a dle redima ar bed.

Gabriel a zisparissas,  
 Elizabeth a goncevas  
 Eur mab etre he daou goste,  
 Precursor d'an Aotrou Doue.

Pa voa Santez Elizabeth  
 O tougen Sant Yan beniget,  
 E teuas ar Verc'hez Vari  
 Evit renta bizit dezi.

Mari a zouge d'ar c'houlse  
 En e entrailloù Mab Doue;  
 Deut voa abers ar Speret-Glan,  
 Da lemel ar pec'her a boan.

P'en devoa Mari saludet  
 E c'hininter Elizabet,  
 Ha dicuet dezi eur joa vras,  
 Daou viracl caër a c'hoarvezas.

3

Sant Yan e cof Elizabeth ;  
 Gant joa a gomangas lamet  
 Evel pa vize d'an daoulin  
 Da zaludi e Vestr Divin.

Ouspen e voa santifiet ,  
 Delivret demeus ar pechet  
 A ro deomp hon tad hag hor mam ;  
 Balamour da bechet Adam.

Piou ne gompreno qet ach an  
 An excelanç eus a Sant Yan ?  
 Grêt voa gant Doue eur zant bras ,  
 Hag en ne voa qet ganet c'hoas.

Pebes joa da Elizabet ;  
 Pa c'hanas he mab beniget :  
 Cavet Jesus en e c'hichen ,  
 Redemptor an natur humen.

Nemeus nep douet evit avanç  
 E voa en ên rejouissanç ,  
 Hag e cane an oll ælez  
 Da Zant Yan cantiquou nevez.

Pa zeo Jesus, Roue a chloar ;  
 Deut eus an ên var an douar ,  
 A ziscuele dre e bresanç  
 Cals demeus a rejouissanç.

Zachari a voa mud rentet  
 Balamour m'en devoa douetet  
 Da gomzou an æl Gabriel,  
 Messenger an Tad Eternel.

4

Mæs Sant Yan pa zeo bet ganet,  
 Ar gomz d'e dad en deus roet;  
 Rac chetu amàn e gomzou:  
 Yan, emezàn, eo e hano.

Ette ar vugale malet  
 Zo biscoas gant groagez ganet,  
 N'en deus qet bet heppen unan  
 Brassoc'h evit ma zeo Sant Yan.

Jesus-Christ pa voa var ar bed  
 Eo en deveus e lavaret;  
 Me gred hor Zalver pa gomzou  
 A vezo credet hep testou.

Sant Yan biscoas ne ras pec'het,  
 Ha ras pinijen bras bepret;  
 Paourente, poan, humilite,  
 N'en deus bet qen en e vue.

N'en devoa qen evit dillat  
 Nemet crochenniq un danvat;  
 E deliciussa cheriou.  
 Voa dour sclær ha griziu louzou.

E vele voa an douar yen,  
 E di ar meas, e bluec men,  
 E dapis hag e lincelliou  
 Ne voant nemet spoe ha delliou.

E gompagnunez al loenet,  
 Bleizi, moc'h-gouez ha leonet,  
 E jardinou d'en em bourmen,  
 Coajou, drez, spern, dour ha bouillen.



## 5

Concluomp eta, christenien,  
 Eo necesser-bras ar binijen,  
 Pa zeo eun den qen inoçant  
 A zouffr qement-all a dourmant.

Sant Yan en dezert er gis-se  
 Ne rê nemet pedi Doue,  
 Ha gortos gant eun dezir bras  
 Donedigez ar Messias.

Mæs pa voa arru an termen  
 Da brena an natur humen,  
 E quitas Sant Yan ar c'hoajo  
 Evit mont da zerman dre'r vro.

Da laret d'an dud dizordren  
 E voa ret ober pinijen  
 Evit prepari an hentchou  
 Da zigemeret an Aotrou.

Ar brud vad demeus e vue,  
 E sqiant, e otorite,  
 A rê d'an dud a bep canton  
 Donet d'e glêvet o sermon.

E zellou a voa qer charmant,  
 Qen douç e gomz, qer ravissant,  
 Ma sonjent oll bian ha bras  
 Penaos voa én ar Messias.

Bete memes ar judevien  
 A zeputas o beleyen  
 Evit mont da c'houlen oountàn  
 Hag ar C'hrist a rer anezàn.

## 6

Mæs, én en deveus respontet  
 Ne voa na Christ nag eur prophet,  
 Nemet eur vouez en, eur dremen  
 O laret ober pinijen.

Sant Yan eleach ma tremene  
 Ouspen sarmon e vadeze;  
 Gant e gomzou e yent contant  
 Da zench ha caout badiziant.

Pa voa o sarmon evellen  
 E qichen bord rivier Jourdren,  
 E teuas Jesus e-unan  
 Da veza badezet gant Yan.

Sant Yan en istant m' er guelas  
 Ous e anaout en discuezas:  
 Hemàn, emezàn, eo an Oan  
 A lamo ar pec'her a boan.

Hén zo bet deomp prometet  
 Gant qement eus a brophetet:  
 Chetu amàn Oan Doue,  
 Hor Mæstr, hor C'hrouer, hon Roue.

Piou a gomprenas biscoas  
 Humilite ar Messias,  
 Pa blijas gantàn er Jourdren;  
 Monet e renq ar bec'herien.

Da effaci ar pec'hejou  
 E ve grêt ar vadianchou,  
 Mæs Jesus, hag én inoçant;  
 A recevas ar vadiziant.

7

Chetu amàn traou surprenant  
 Hag a ra din coll ar parlant,  
 Guelet Jesus humiliet  
 Dirac nep en devoe crouet.

Jesus, hor Mæstr, Roue a c'hloar.  
 A zo prosternet dan douar;  
 Mæs Yan o rei ar vadiziant,  
 Zo henoret evel eur zant.

Jesus a zo var e zaoulin,  
 Hag én eur personach divin;  
 Jesus a zo e plaç ar pec'her,  
 Ha Yan zo e plaç hor Zalver.

C'houi, Sant Yan, p'o poa an henor  
 Da vadezi hon Redemptor,  
 A remerqas a ziouc'h e benn  
 Ar Speret-Santel o tisqenn.

C'houi glêvas an Tad Eternel,  
 Oc'h anzae eno e Vugel:  
 Hennes eo va Mab, emezàn,  
 Va flijadur a zo ennàn.

Sant Yan p'en devoa badezet  
 Jesus hor Zalver beniget,  
 A yas da bales Herodes,  
 D'e vlam eus e aoultries.

Mæs ar roue Herodias,  
 Ous Sant Yan en em goleras,  
 Hag a ras dre suazion  
 Laqât anezàn er prizon.

8

Pa voa ar roue eun devez  
 O leina e compagnenez,  
 E teuas merch ar plac'h flaman  
 Da ober eun dans dirazàn.

Ar roue neuze a laras  
 D'ar verc'h-se da Herodias,  
 Goulen eun dra benac ountàn,  
 Hag e devize anezàn.

Gant he mam ar plac'h qelennet,  
 Pen Sant Yan e deus goulennet;  
 Troc'het voe er prizon e benn,  
 Ha roet dezi he goulenn.

Sant Yan, bremàn ez oc'h er gloar,  
 Goude ho poan var an douar:  
 Oc'h assistanç a c'houlennomp;  
 O pezet sonch eus ac'hanomp.

Hor prezervit ous teir goalen:  
 Brezel, qernez hag ar vocen,  
 Dre ho pedennou deiz ha nos  
 Hor c'hunduet d'ar barados.

**F I N.**

---

**E MONTROULEZ, e ti LÉDAN, e ru ar Var.**